

# Tiada Konsep Terpaksa Dalam Isu Pelacuran<sup>1</sup>

## MUQADDIMAH

Kita dikejutkan dengan pandangan Dr. Mashitah yang menjelaskan bahawa seseorang wanita yang melacurkan dirinya kerana kesempitan hidup adalah dibenarkan. Jawapan kepada soalan yang ditanya oleh Razin ini amat memeranjatkan seluruh umat Islam di Malaysia khususnya kerana pandangan yang dinyatakan oleh Dr Mashitah jelas menunjukkan kedengkelan beliau dalam menguasai ilmu Qawaid Fiqhiyyah. Berikut adalah petikan soalan dan jawapan yang sangat mendukacitakan:

*SAYA sering membaca kisah wanita (terutama ibu tunggal) yang terpaksa menjual diri untuk membesarkan anak.*

*Punca pendapatan ini secara terang adalah haram.*

*Persoalannya, adakah kehidupan dan pendidikan anak yang membesar dengan wang begini akan mendapat keberkatan Allah?*

*Adakah anak yang mengetahui pekerjaan ibunya tetapi masih menggunakan wang itu akan turut berdosa?*

*Dan bagaimana pula hukumnya jika wang itu digunakan untuk membayar zakat fitrah?*

**RAZIN**  
**Kuala Lumpur**

## JAWAPAN

*HUKUM di dalam Islam berbeza mengikut keadaan seseorang.*

*Mengikut istilah yang dipakai di sini, iaitu 'terpaksa', membayangkan wanita berkenaan terdesak melakukan perbuatan dilarang dan bukan dengan kehendak hatinya.*

*Dia terdesak berbuat demikian demi menyelamatkan anak dan memberi makan.*

*Perkara dilakukan dalam suasana darurat terlepas daripada hukuman biasa.*

*Dalam keadaan biasa, memang melacur itu haram, tetapi jika terdesak dan darurat ia dimaafkan.*

*Di sinilah timbulnya tanggungjawab masyarakat untuk membantu.*

*Orang terdesak dan darurat tidak mungkin mampu membayar zakat fitrah, bahkan dia tergolong layak terima fitrah.*

*Jika sampai ada lebihan, bererti dia sudah tidak darurat.<sup>2</sup>*

Jawapan yang menggemparkan ini telah menyebabkan pelbagai tindak balas daripada pembaca yang menyebabkan Dr. Mashitah sekali lagi cuba untuk *menjelaskan* kenyataan beliau berhubung dengan isu ini. Berikut adalah penjelasan dari Dr Mashitah sendiri berkenaan isu ini.

---

<sup>1</sup> Kajian ringkas ini adalah hasil tangan saya yang merupakan jawapan kepada satu isu yang pernah ditimbulkan oleh Dr. Mashitah pada tahun-tahun yang lampau. Kajian ringkas ini pernah dibahaskan dan dikeluarkan oleh PMRAM sewaktu isu ini hangat diperkatakan.

<sup>2</sup>[http://www.hmetro.com.my/Current\\_News/HM/Section/khas\\_html?mysec=AMMJ](http://www.hmetro.com.my/Current_News/HM/Section/khas_html?mysec=AMMJ)

Daripada : Syafiqe

Assalamualaikum Dato! Saya terdapat sedikit kekeliruan mengenai jawapan dan komentar Dato berdasarkan isu boleh melacur jika seseorang itu terdesak di dalam Harian Metro. Saya merasakan perkara ini kurang jelas untuk difahamkan kepada umum. Jadi saya minta Dato perelaskan dengan lebih lanjut!

Jawapan :

Terima kasih kerana ikhlas bertanya saya tentang isu ini secara terbuka. Sebenarnya saya menjawab soalan Razin dalam ruangan 'Anda Musykil Dr Mashitah Jawab' ( METRO) yang mempersoalkan apakah hukumnya ibu tunggal yang terpaksa menjual diri untuk membesarkan anak-anak, adakah anak yang sudah mengetahui pekerjaan ibunya tetapi masih menggunakan wang itu akan turut berdosa? , dan apakah hukumnya wang itu dizakatkan?

Berdasarkan jawapan saya hukum dikeluarkan berbeza-beza mengikut keadaan atau zuruf. Dalam keadaan biasa saya menjelaskan bahawa melacur itu tetap haram di sisi Islam. Namun ketika dalam darurat ia di maafkan. Di sini apa yang ingin saya sampaikan bukan bermakna jika keadaan terdesak dan terpaksa perempuan dibolehkan melacur. Sebaliknya hanya dalam keadaan benar-benar darurat.

Contoh paling mudah ialah khinzir : di sisi Islam ia haram dimakan namun ketika darurat (tiada langsung makanan ) khinzir boleh dimakan. Jadi dalam keadaan ini melacur dimaafkan ketika dalam darurat sahaja. Masyarakat sendiri lebih memahami apakah maksud darurat di Malaysia.

Persoalannya adakah di negara kita sudah sampai tahap darurat? Tidak, jadi saya cuba mengajak masyarakat dan insan yang bertanya berfikir secara rasional. Adakah dengan menjadi ibu tunggal sudah sampai tahap darurat? Malah ingin membayar zakat fitrah lagi. Sedangkan kita ada Kementerian Pembangunan Wanita dan Masyarakat serta pelbagai organisasi yang akan membela nasib para ibu tunggal. Justeru, saya tetap menyatakan dalam kes soalan Razin itu sebagai haram seorang ibu tunggal melacurkan dirinya.

Begitu juga, saya telah memberi penekanan kepada perkataan terpaksa yang bermaksud kemungkinan seseorang wanita itu ditipu dan diperangkap lalu dilacurkan. Maka dalam hal ini wanita tersebut tidak bersalah kerana bukan atas kehendaknya sendiri tetapi orang yang menjadi Bapa Ayam itulah yang terpaksa menanggung dosa besar wanita tersebut.

Saya juga suka untuk mengingatkan masyarakat yang terkeliru berdasarkan kenyataan akhir jawapan saya, mengenai isu ini yang jelas telah mengkategorikan masalah ini bukan darurat. Di mana ibu tunggal ini ingin membayar zakat. Lalu saya menjawab : orang yang terdesak dan darurat tidak mungkin mampu membayar zakat bahkan dia tergolong dalam asnaf yang layak menerima zakat. Oleh itu, jelas menunjukkan kepada semua, pekerjaan ibu tunggal yang melacur tadi adalah haram kerana ia terkeluar dari darurat.

Selain itu, dalam ruang tersebut saya sebenarnya telah menjawab dengan panjang lebar tetapi telah dipendekkan kerana kapasiti untuk bahagian menjawab soalan tadi adalah agak terhad. Maka, jawapan saya secara mendalam dan menyeluruh tidak berpeluang dihidangkan kepada pembaca sepenuhnya.

Waakhiran, saya berharap agar jawapan saya tidak disalah ertikan oleh masyarakat kerana ia akan mengeruhkan keadaan sahaja. Dan ini juga hanya jawapan saya dalam ruang soal jawab berdasarkan ilmu yang telah dipinjamkan oleh Allah kepada saya bukannya satu fatwa baru. Yang penting kita jangan cepat melatah!<sup>3</sup>

<sup>3</sup>[http://www.islamhadhari.net/v2/drmashitah/index.php?pageNum\\_drmashitah=0&totalRows\\_drmashitah=33](http://www.islamhadhari.net/v2/drmashitah/index.php?pageNum_drmashitah=0&totalRows_drmashitah=33)

Hujah utama yang digunapakai oleh Dr Mashitah adalah kaedah fiqh yang berbunyi:

### "الضَّرُورَاتُ تُبِيحُ الْمَحْظُورَاتُ"

Namun seakan-akan beliau tidak menyedari bahawa kaedah tersebut mempunyai syarat-syarat yang tertentu dan bukan boleh digunapakai secara bebas.

#### KAEDAH: "الضَّرُورَاتُ تَبِيحُ الْخَطُورَاتُ"

Al-Imam Al-Suyuti meletakkan kaedah ini di bawah salah satu kaedah besar dalam kaedah-kaedah fiqh (القواعد الكلية الكبرى) yang berbunyi:

الضَّرُّ يُزَالُ

Yang bermaksud: Darurat itu adalah dihilangkan.

Kaedah الضر يزال merupakan kaedah besar yang didokongi oleh beberapa kaedah lain bagi melengkapi kaedah besar ini. Tanpa kaedah-kaedah ini, kaedah الضر يزال tidak mampu untuk digunapakai dalam memudahkan ijihad.

Berikut adalah kaedah-kaedah yang duduk di bawah kaedah الضر يزال

#### 1. الضَّرُورَاتُ تُبِيحُ الْمَحْظُورَاتِ بِشَرْطِ عَدَمِ نَقْصَانِهَا عَنْهَا

(Darurat akan membenarkan perkara yang diharamkan tetapi dengan syarat darurat tersebut tidak kurang kedudukannya daripada perkara yang diharamkan)

#### 2. مَا أُبِيحَ لِلضَّرُورَةِ يُقَدَّرُ بِقَدَرِهَا

(Apa yang dibenarkan atas alasan darurat hendaklah digunapakai pada kadar yang diperlukan sahaja)

#### 3. الضَّرُّ لَا يُزَالُ بِالضَّرِّ

(Kemudaratan tidak akan dihilangkan dengan mendatangkan kemudaratan yang baru)

#### 4. إِذَا تَعَارَضَتْ مَفْسَدَتَانِ رُوِيَ أَعْظَمُهُمَا ضَرَرًا بَارْتِكَابَ أَخَفِّهِمَا

(Apabila bertembung antara dua kemudaratan maka hendaklah diutamakan mudarat yang lebih mendatangkan kesan buruk yang besar dengan cara mendatangi mudarat yang lebih kecil kesan negatifnya)

#### 5. دَرْءُ الْمَفَاسِدِ أَوْلَى مِنْ جَلْبِ الْمَصَالِحِ

(Menolak kemudaratan lebih patut dilaksanakan daripada mendatangkan kebaikan)

## DEFINISI DARURAT DALAM KAMUS FIQH

بُلُوغُ الْإِنْسَانِ حَدًّا إِنْ لَمْ يَتَنَاوَلَ الْمَمْنُوعَ هَلَكًا أَوْ قَارَبَ ، كَالْمُضْطَرِّ لِلْأَكْلِ وَاللَّبْسِ بِحَيْثُ لَوْ بَقِيَ جَانِعًا أَوْ غُرْيَانًا لَمَاتَ ، أَوْ تَلَفَ مِنْهُ عَضْوٌ ، وَهَذَا يُبَيِّحُ تَنَاوُلَ الْمُحَرَّمَ <sup>4</sup>.

Bermaksud:

*Darurat ialah tahap yang dicapai oleh seseorang yang sekiranya dia tidak melakukan perkara yang haram, dia akan mati ataupun hampir kepada kematian seperti seseorang yang terpaksa untuk makan dan berpakaian dalam keadaan seandainya dia tetap dalam keadaan lapar dan terlanjang tanpa pakaian, dia akan mati ataupun anggota badannya akan mengalami kecacatan. Maka keadaan ini sahajalah yang akan menjadikan perkara yang haram pada asalnya berubah kepada dibenarkan.*

## PANDANGAN ISLAM DALAM MASALAH SESEORANG YANG MELACURKAN DIRI KERANA TERPAKSA.

Sebagaimana yang saya nyatakan tadi, kaedah الضرر يزال tidak boleh diguna pakai sewenang-wenangnya malahan mesti dibantu dengan kaedah-kaedah kecil yang dianggap sebagai juzuk-juzuk penting kepada kaedah ini.

Antara kaedah kecil kepada kaedah الضرر يزال adalah kaedah:

الضَّرُورَاتُ تُبَيِّحُ الْمَحْظُورَاتِ بِشَرَطِ عَدَمِ نُقْصَانِهَا عَنْهَا

Kaedah ini memberikan kepada kita satu penjelasan bahawa kemudahan yang bakal terhasil seandainya seseorang individu itu tetap tidak mahu melakukan sesuatu perkara yang haram mestilah lebih besar kesan buruknya daripada perkara yang diharamkan oleh syarak tersebut.

Contoh:<sup>5</sup>

1. Seseorang yang berada dalam kelaparan yang teramat sangat dan dia tidak mendapati sebarang makanan yang halal, individu tersebut dibenarkan untuk memakan bangkai binatang tetapi sekadar keperluan yang boleh menghalangnya daripada mati.

Keterangan:

Perkara yang diharamkan oleh syarak di dalam masalah ini adalah memakan bangkai. Keadaan darurat pula ialah orang yang lapar tersebut akan mati seandainya dia tidak memakan bangkai. Kematian adalah lebih besar daripada haramnya memakan bangkai kerana ia akan membawa kepada membunuh satu jiwa. Oleh itu Allah membenarkan seseorang memakan bangkai seandainya dia berada dalam keadaan yang sangat mendesak.<sup>6</sup>

2. Seseorang yang diancam untuk dibunuh seandainya tidak murtad daripada agama Islam adalah dibenarkan untuk melafazkan kata-kata yang membawa kepada murtad dengan syarat individu yang dipaksa tersebut tetap beriman kepada Allah di dalam hatinya.

<sup>4</sup> Mausū'ah Fiqhiyyah Kuwaitiyyah Takrif الضرورة ,

<http://feqh.alislam.com/Display.asp?DocID=100&MaksamID=1951&ParagraphID=11343&Sharh=0>

<sup>5</sup> Asybah Wa Al-Nazair 1/168-169 cetakan Dar Al-Kutub Al-Ilmiyyah

<sup>6</sup> Surah Al-Maidah ayat 3

Keterangan:

Perkara yang diharamkan dalam masalah ini adalah melafazkan kata-kata yang mengakibatkan murtad. Namun di sana ada darurat iaitu kematian orang yang dipaksa seandainya dia tetap tidak mahu melafazkan kata-kata yang membawa kepada gelinciran aqidah. Maka atas sebab menjaga ruh adalah lebih besar daripada melafazkan kata-kata riddah secara zahir sahaja maka Islam membenarkan individu tersebut untuk melafazkan kata-kata riddah bagi menjaga nyawanya.

Namun persoalannya adakah zina dan pelacuran dibenarkan seandainya si wanita terpaksa melakukan perbuatan terkutuk ini atas sebab ingin menari sesuap rezeki ataupun ingin menyara kehidupan anak-anak dan keluarga?

Saya ingin menolak apa yang disebutkan oleh Dr. Mashitah dengan beberapa hujah:

**Pertama :**

Adakah kita dapat membayangkan ada di sana ada situasi seorang wanita di Malaysia yang tidak mendapati sebarang cara untuk menyara kehidupan diri dan keluarga melainkan hanya dengan cara melacurkan diri dalam keadaan wanita tersebut akan mati ataupun cacat anggota atau tubuhnya akan mengalami masalah kesihatan yang memudaratkan seandainya tidak melacurkan diri? Ini kerana konsep darurat sebagaimana yang telah diterangkan memberi erti keadaan seseorang yang terlalu kritikal dan tidak mampu untuk mempertahankan nyawanya serta jasadnya hanya dengan cara mengambil perkara yang pada asalnya diharamkan oleh syarak.

Bukankah bumi Allah terlalu luas dan rezeki pemberianNya tidak terhingga serta tidak terbatas? Bukankah masih banyak peluang-peluang yang halal bagi mendapatkan wang dan rezeki yang halal. Allah Taala berfirman :<sup>7</sup>

يَا أَيُّهَا الَّذِينَ آمَنُوا كُلُوا مِن طَيِّبَاتِ مَا رَزَقْنَاكُمْ وَاشْكُرُوا لِلَّهِ إِن كُنتُمْ إِيَّاهُ تَعْبُدُونَ

Seandainya kita tidak mampu untuk menjadikan keadaan melacurkan diri kerana terpaksa termasuk di bawah definisi darurat menurut syarak, bagaimana kita mampu untuk menyatakan kepada masyarakat bahawa melacur kerana terpaksa adalah dibenarkan berpegang dengan kaedah *الضرر يزال* ?

Jelasnya masalah pelacuran tidak termasuk dalam kaedah *الضرر يزال* sekalipun berkemungkinan wujud situasi seorang wanita yang tidak mendapati sebarang cara untuk mendapatkan sesuap rezeki melainkan dengan cara menjadi pelacur. Sekurang-kurangnya wanita tersebut boleh meminta sedekah di jalanan daripada menjual kehormatan. Bukankah meminta sedekah itu lebih mulia daripada menjual kehormatan diri?

Apa yang saya nyatakan ini turut disokong oleh Dr. Mashitah sendiri. Beliau menyebut:

*Masyarakat sendiri lebih memahami apakah maksud darurat di Malaysia. Persoalannya adakah di negara kita sudah sampai tahap darurat? Tidak, jadi saya cuba mengajak masyarakat dan insan yang bertanya berfikir secara rasional. Adakah dengan menjadi ibu tunggal sudah sampai tahap darurat? Malah ingin membayar zakat fitrah lagi. Sedangkan kita ada Kementerian Pembangunan Wanita dan Masyarakat serta pelbagai organisasi yang akan membela nasib para ibu tunggal. Justeru, saya tetap menyatakan dalam kes soalan Razin itu sebagai haram seorang ibu tunggal melacurkan dirinya.*<sup>8</sup>

<sup>7</sup> Surah Al-Baqarah ayat 172

<sup>8</sup> [http://www.islamhadhari.net/v2/drmashitah/index.php?pageNum\\_drmashitah=0&totalRows\\_drmashitah=33](http://www.islamhadhari.net/v2/drmashitah/index.php?pageNum_drmashitah=0&totalRows_drmashitah=33)

## Kedua :

Seandainya kita menerima bahawa ada dalam beberapa keadaan wanita akan tersepit dalam dilema lantas terpaksa melacurkan diri demi semata-mata ingin mencari sesuap rezeki, namun untuk membenarkan wanita dalam situasi ini untuk melakukan zina semata-mata kerana darurat kononnya tetap tidak dibenarkan oleh syarak. Ini kerana antara syarat penggunaan kaedah “darurat itu membenarkan larangan yang diharamkan” adalah darurat yang terhasil hendaklah lebih besar kesan buruknya berbanding dengan larangan yang dikeluarkan. Persoalannya adakah kesan buruk daripada tidak melacurkan diri sekalipun membawa kepada kematian adalah lebih besar buruknya daripada larangan tidak menjual maruah dan harga diri?

Al-Imam Al-Suyuti menyatakan bahawa seseorang yang diugut bunuh seandainya dia tidak melacurkan dirinya, wanita ini tetap tidak boleh melacurkan dirinya sekalipun risikonya adalah kematian kerana kaedah menyebut:

الضَّرُورَاتُ تُبَيِّحُ الْمَحْظُورَاتِ بِشَرْطِ عَدَمِ نُقْصَانِهَا عَنْهَا

yang bermaksud:

*Darurat akan membenarkan perkara yang diharamkan tetapi dengan syarat darurat tersebut tidak kurang kedudukannya daripada perkara yang diharamkan.*

Beliau menyebut:

وَقَوْلَنَا : " بِشَرْطِ عَدَمِ نُقْصَانِهَا عَنْهَا " لِيَخْرُجَ مَا لَوْ كَانَ الْمَيِّتُ نَبِيًّا فَإِنَّهُ لَا يَحِلُّ أَكْلُهُ لِلْمُضْطَّرِّ لِأَنَّ حُرْمَتَهُ أَعْظَمُ فِي نَظَرِ الشَّرْعِ مِنْ مُهْجَةِ الْمُضْطَّرِّ . وَمَا لَوْ أَكْرَهَ عَلَى الْقَتْلِ أَوْ الزَّانَا ، فَلَا يُبَاحُ وَاحِدٌ مِنْهُمَا بِالْإِكْرَاهِ لِمَا فِيهِمَا مِنَ الْمَفْسَدَةِ الَّتِي تُقَابِلُ حِفْظَ مُهْجَةِ الْمُكْرَهِ ، أَوْ تَزِيدُ عَلَيْهَا .<sup>9</sup>

yang bermaksud:

*“Syarat yang kami letakkan yang berbunyi “dengan syarat darurat tidak kurang daripada kesan buruk larangan seandainya dilakukan” adalah untuk kami keluarkan masalah seandainya mayat itu adalah jenazah seorang nabi. Maka tidak boleh (haram dari segi syarak) seseorang yang sangat kelaparan untuk memakan daging mayat seorang nabi. Ini kerana menjaga kehormatan mayat nabi tersebut lebih besar di sisi pandangan syarak daripada kemudahan orang yang sangat-sangat kelaparan.*

*Syarat ini juga untuk mengeluarkan masalah seseorang yang diancam untuk dibunuh seandainya orang yang diancam ini tidak membunuh orang tertentu atau akan diancam untuk dibunuh seandainya orang yang diancam tersebut tidak melakukan zina. Maka tidak akan dibenarkan sama sekali salah satu daripada dua perkara tadi (membunuh dan berzina) kerana mudarat dan risiko “akan dibunuh” yang ditanggung oleh orang yang dipaksa adalah sama tarafnya dengan kebaikan menjaga nyawa yang ingin dijaga oleh orang yang dipaksa untuk membunuh dan berzina ataupun mungkin mudarat yang terhasil seandainya orang yang dipaksa melakukan apa yang disuruh dengan membunuh insan lain dan berzina adalah lebih besar berbanding dengan risiko menjaga roh dan nyawa yang ingin dijaga oleh orang yang dipaksa”.*

Apa yang disebut oleh Al-Imam Al-Suyuti adalah sangat jelas. Adakah nyawa orang yang dipaksa lebih berharga daripada insan ketiga yang akan dibunuh oleh orang yang dipaksa?

Begitu juga dalam masalah orang yang diancam untuk dibunuh seandainya dia tidak melakukan zina. Bukankah akibat zina adalah sangat besar? Anak zina akan lahir, keluarga wanita yang dizina akan menanggung malu seumur hidup dan mungkin ada di kalangan

<sup>9</sup> Asybah Wa Al-Nazair 1/170 cetakan Dar Al-Kutub Al-Ilmiyyah

mereka akan membunuh diri semata-mata tidak mampu untuk menanggung aib yang sangat menjelekkan ini.

Kalaulah seseorang yang diancam bunuh seandainya tidak berzina tetap tidak dibenarkan oleh Islam untuk berzina sekalipun akan diancam bunuh, maka apa pandangan pembaca dengan masalah seorang wanita yang tidak mendapati sumber rezeki yang cukup lalu mengambil jalan mudah dengan menjual kehormatannya? Adakah perbuatan wanita ini akan dibenarkan oleh Islam dengan berpegang kononnya dengan kaedah “darurat akan membenarkan perbuatan yang asalnya adalah haram”?

Oleh itu apa yang disebut oleh Dr. Mashitah ditolak sama sekali kerana bahaya dan kesan buruk yang bakal terhasil adalah sangat besar yang bukan sahaja ditanggung oleh wanita yang berzina malah aib tersebut akan turut ditanggung oleh insan-insan lain yang tidak berdosa. Ini berbeza dengan kematian seorang wanita yang tidak mendapat sesuap rezeki. Risikonya hanya ditanggung oleh wanita tersebut sahaja.

Walau bagaimanapun, seandainya di sana ada wanita yang tidak mendapat sebarang cara untuk mendapatkan makanan lalu bersabar sehingga mati daripada menjual maruahnyanya, maka ketika ini seluruh masyarakat Islam khususnya pemerintah akan berdosa dan akan ditanya oleh Allah di *mahsyar* kelak kerana membiarkan seorang individu Islam mati dalam keadaan tidak terbela.

### Ketiga

Satu Kaedah Feqh ada menyebut:

الأَصْلُ فِي الْإِبْطَاعِ الْحُرْمَةُ

**Asal kepada kehormatan wanita itu adalah diharamkan**

Imam Al-Suyuti turut membawakan kepada kita satu masalah yang menunjukkan bahawa menjaga kehormatan itu satu perkara yang sangat-sangat dititikberatkan oleh Islam.

Masalah tersebut adalah kes seorang lelaki (orang yang mewakilkan) yang meminta sahabatnya (wakil) untuk membelikan hamba wanita untuk lelaki yang mewakilkan lalu si wakil membeli seorang hamba wanita untuk temannya yang meminta bantuannya untuk membeli hamba. Dalam perjalanan pulang, teman yang menjadi wakil dalam pembelian hamba wanita tersebut meninggal dunia sebelum sempat menyerahkan hamba wanita tersebut kepada sahabatnya. Persoalannya adakah lelaki yang mewakilkan itu boleh mengambil hamba wanita itu sebagai hambanya lalu halal baginya untuk melakukan persetubuhan bersama hamba wanita tersebut?

Jawapannya adalah haram bagi lelaki tersebut untuk bersetubuh dengan hamba wanita itu kerana kaedah menyatakan “**Asal kepada kehormatan wanita itu adalah diharamkan**”. Ini bermakna seseorang individu tidak dibenarkan bersetubuh dengan mana-mana wanita melainkan apabila ada sebab yang betul-betul pasti bahawa dia dibenarkan oleh syarak dengan cara perkahwinan yang sah dan perhambaan.

Dalam kes di atas, secara zahirnya hamba wanita itu dibeli oleh si wakil untuk diserahkan kepada temannya yang meminta bantuannya untuk membeli hamba tersebut. Namun di sana ada kemungkinan bahawa si wakil yang mati dalam perjalanan pulang tersebut membeli hamba wanita itu untuk dirinya sendiri dan bukan untuk si teman yang mewakilkan.

Atas dasar berpegang dengan kaedah “**Asal kepada kehormatan wanita itu adalah diharamkan**” maka lelaki yang mewakilkan tersebut tidak boleh menyetubuhi hamba wanita yang telah dibeli tersebut.

Apa yang ingin saya tekankan di sini adalah: kalaulah seorang yang mewakilkan temannya untuk membeli seorang hamba wanita tetapi temannya yang menjadi wakil tersebut

pdfMachine

**A pdf writer that produces quality PDF files with ease!**

Produce quality PDF files in seconds and preserve the integrity of your original documents. Compatible across nearly all Windows platforms, simply open the document you want to convert, click “print”, select the “Broadgun pdfMachine printer” and that’s it! Get yours now!



meninggal dunia di perjalanan lantas syarak memandang haram hukumnya bagi lelaki yang mewakilkan tersebut untuk bersetubuh dengan hamba wanita walaupun secara zahirnya hamba tersebut adalah kepunyaannya maka persoalannya adalah adakah seorang wanita yang hanya ketiadaan wang yang cukup dibenarkan oleh syarak untuk melacurkan dirinya?

Bandingkan dengan kes pembelian hamba wanita di atas. Kalaupun si pewakil tidak dibenarkan oleh syarak untuk menggauli hamba wanita yang telah dibeli sekalipun secara zahirnya hamba itu adalah milik si pewakil hanya semata-mata ingin menjaga kaedah **“Asal kepada kehormatan wanita itu adalah diharamkan”** yang tidak membenarkan sama sekali berlaku sebarang hubungan seks sewenang-wenangnya hanya melainkan dengan perkahwinan dan perhambaan yang sah secara yakin seratus peratus, adakah kita ingin membenarkan seorang wanita melacurkan dirinya dengan alasan yang tidak diterima oleh syarak dengan berhujahkan kaedah darurat? Adakah kita ingin menolah kaedah **“Asal kepada kehormatan wanita itu adalah diharamkan”** lantas kita dengan sewenang-wenangnya membenarkan pencerobohan ke atas kehormatan seorang wanita yang sangat dipandang berat oleh Islam dalam keadaan zina telah jelas bahawa hukumnya adalah haram?

## PENUTUP

Apa yang kita bincangkan menatijahkan jawapan yang jelas bahawa haram bagi seorang wanita walau dalam apa keadaan sekalipun untuk melacurkan dirinya kerana kesan yang bakal lahir dan terhasil daripada jenayah sundal dan pelacuran adalah sangat besar yang bukan sahaja memberi kesan buruk kepada wanita yang menjadi pelacur malahan kesan buruk ini akan turut mengena pihak-pihak lain yang tidak berdosa.

Apa yang dinyatakan oleh Dr, Mashitah adalah ditolak sama sekali kerana sebagai seorang insan yang tidak mempunyai autoriti dalam berijtihad, beliau sepatutnya merujuk apa yang telah disebut oleh para ulama Islam yang telah sampai ke peringkat ijtihad dalam menerangkan permasalahan hukum kepada masyarakat.

Inilah masalah yang sering timbul di Malaysia khasnya. Individu-individu yang ada latar belakang pengajian Islam apabila pulang ke Malaysia meletakkan diri mereka sebagai seorang mujtahid lantas begitu lantang mengeluarkan pandangan peribadi dalam perbahasan hukum tanpa merujuk pandangan para ulama mujtahid sebelum menerangkan kepada masyarakat apa-apa hukum Fiqh yang dipersoalkan.

Seseorang mujtahid apabila tersalah dalam memberikan pandangan dalam masalah hukum, Allah Taala akan tetap memberikan pahala dan ganjaran kepadanya kerana usahanya dalam mencari hukum Allah. Namun seseorang yang keilmuannya tidak melayakkan dirinya untuk berijtihad (muqallid), **haram** hukumnya bagi individu ini untuk mengeluarkan pandangan akalnya dalam menjawab persoalan yang berkaitan dengan hukum-hakam Fiqh kerana hak untuk berijtihad dalam mencari hukum Allah hanya diberikan kepada individu-individu yang telah menguasai ilmu-ilmu Islam yang menjadi syarat dalam berijtihad secara masak dan pakar.

Saya menasihatkan kepada semua golongan lepasan pengajian Islam agar tidak bermudah-mudah dalam masalah hukum-hakam syarak. Kita sememangnya mesti berusaha untuk mendalami bidang-bidang yang menjadi syarat yang melayakkan kita untuk berijtihad contohnya seperti Usul Fiqh, bahasa Arab, ayat-ayat Al-Quran dan hadith Rasulullah yang berhubungkait dengan masalah Fiqh, Qawaid Fiqhiyyah, Maqasid Syar'iyah dan sebagainya. Ini memang tugas kita agar agama Islam dapat dikupas berdasarkan disiplin ilmu Islam dan bukannya berdasarkan hawa nafsu yang jauh dari lingkungan ilmu Islam.

Namun seandainya kalian tidak mampu untuk mendalami bidang-bidang tersebut secara pakar dan masak maka kalian tidak berhak sama sekali mendatangkan pandangan akal kalian dalam menjawab sebarang isu yang berkaitan dengan masalah hukum Fiqh melainkan mengikut sahaja apa yang telah dinyatakan oleh golongan ulama Islam yang telah sampai ke peringkat ijtihad.

pdfMachine

A pdf writer that produces quality PDF files with ease!

Produce quality PDF files in seconds and preserve the integrity of your original documents. Compatible across nearly all Windows platforms, simply open the document you want to convert, click “print”, select the “Broadgun pdfMachine printer” and that’s it! Get yours now!



Saya berharap agar Dr. Mashitah mendatangkan kepada kita pandangan ulama yang mempunyai autoriti dalam berijtihad dalam masalah melacurkan diri kerana terpaksa ini. Datangkan kepada kami pandangan mereka seandainya ada di kalangan mereka yang membenarkan seorang wanita melacur hanya kerana terpaksa atau darurat. Seandainya anda tidak mampu mendatangkan pandangan ulama muktabar yang menyokong pandangan anda, anda **wajib** untuk menarik kembali pandangan anda yang telah terpesong daripada disiplin ilmu Islam berhubungkait dalam masalah darurat.

Moga tulisan ringkas ini dapat menjernihkan kekeruhan yang timbul dalam isu pelacuran ini.

Hairul Nizam Mat Husain,

Tahun Dua,  
M.A Usul Feqh,  
Universiti Al-Azhar Al-Syarif.